



PATNUBAY SA MISA



11 Hunyo 2017


Dakilang Kapistahan ng Banal na Santatlo

Taon A

LUWALHATI SA SANTATLO – ANG DI-NAHAHATING PAGKAKAISA!

Kung malaking bahagi man ng ating pagsambang liturhiko ay para sa karangalan ng Banal na Santatlo, ngayo'y lalo pa tayong ginaganyak na magpugay sa Tatlong Persona ng Diyos. Di abot ng ating hamak na pang-unawa ang pangunahing misteryo ng tatlong Persona sa iisang Diyos. Di rin kaya ng ating mga puso ang sapat na pagtugon sa Kanyang pagmamahal. Lagi na lang may higit pa tayong dapat malaman tungkol at higit pang dapat nating gawin sa pagmamahal sa Banal na Santatlo.

Gayunman, ang pinakamalaking hamon ay ang pagkakaroon din sa ating sarili't sa ating mga pakikitungo ng pagmamahal, pakikipagkasundo, at pakikipagkaisang tulad ng sa Tatlong Banal na Persona. Ito ang ating idalangin para sa ating mga sarili at lahat ng mga mahal natin sa pag-aalay ng Eukaristiyang ito sa Ama, sa pamamagitan ni Hesus na Kanyang Anak, sa kapangyarihan ng Espiritu Santo.



PASIMULA



Pambungad

(Ipahahayag lamang kung walang awiting nakahanda.)

Purihin ang D'yos na banal na sa ati'y nagmamahal. Ama na Bukal ng buhay, Anak na s'ya nating Daan, Espiritung ating Tanglaw.

Pagbati

P –Biyaya at kapayapaang buhat sa Diyos Ama, Panginoong Hesukristo, at Espiritu Santo ay sumainyong lahat!

B –At sumaiyo rin!

Pagsisisi

P –Ang Eukaristiya ay siyang pinakadakilang pagsambang maiaalay natin sa Banal na Santatlo. Alalahanin nating di tayo karapat-dapat humarap sa Kanya, at kailangan nating mahugasan sa ating pagkakasala. (*Manahimik saglit.*)

P –Panginoong Hesus, naparito ka upang ipakita sa amin ang pagmamahal ng Ama para sa sangkatauhan. Panginoon, kaawaan mo kami!

B –Panginoon, kaawaan mo kami!

P –Panginoong Hesus, naparito ka upang turuan kaming magmamahal na tulad ng iyong pagmamahal sa amin. Kristo, kaawaan mo kami!

B –Kristo, kaawaan mo kami!

P –Panginoong Hesus, naparito ka upang ipagkaloob sa amin ang Espiritu Santong aming bukal ng kabanalan at pag-asa. Panginoon, kaawaan mo kami!

B –Panginoon, kaawaan mo kami!

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen!

Papuri

B –Papuri sa Diyos sa kaitaasan at sa lupa'y kapayapaan sa mga taong kinalalugdan niya. Pinupuri ka namin, dinarangal ka namin, sinasamba ka namin, ipinagbunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos,

Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P –Ama naming makapangyarihan, sa iyong pagsusugo sa Salitang Diyos na totoo at maaasahan at sa pagbibigay mo ng Espiritung nagpapabanal sa sanlibutan ipinahayag ang iyong kahiwagaang dakila sa sangkatauhan. Sa panampalatayang amin ngayong ipinagdiriwang ipagkaloob mong aming maidangal ang Tatlong Persona sa walang hanggang kadakilaan at aming sambahing lubusan ang iyong iisang pagka-Diyos sa mahal na kapangyarihan sa pamamagitan ni Hesukristo kasama ng Espiritu Santo magpasawalang hanggan.

B –Amen!

PAGPAPAHAYAG NG SALITA NG DIYOS



Unang Pagbasa *Exo 34:4-6,8-9*

Sa Matandang Tipan pa man, ipinahayag na ng Panginoon ang Kanyang sarili bilang “isang mapagmahal at maawaing Diyos: hindi madaling magalit at nananatiling tapat.” Gayon ang mga katangian ng “Diyos ng pag-ibig” na ganap na ipahahayag ng Kanyang Anak na si Hesukristong Salitang nagkatawang-tao.

L—Pagpapahayag mula sa Aklat ng Exodo

Noong mga araw na iyon, tumapay si Moises ng dalawang bato at dinala kinaumagahan sa Bundok ng Sinai.

Ang Panginoon ay bumaba sa ulap, lumagay sa tabi ni Moises at binanggit ang kanyang pangalan: “Panginoon.”

Ang Panginoon ay nagdaan sa harapan ni Moises. Sinabi niya, “Akong Panginoon ay mapagmahal at maawain. Hindi ako madaling magalit; patuloy kong ipinadarama ang aking pag-ibig at ako’y nananatiling tapat.”

Nanikuhod si Moises at sumamba sa Panginoon. Sinabi niya, “Kung talagang kinalulugdan ninyo ako, isinasamo kong samahan ninyo kami kahit na matigas ang ulo ng lahing ito. Patawarin na ninyo kami at tanggapin bilang inyong bayan.”

Ang Salita ng Diyos!

B—Salamat sa Diyos!

Salmong Tugunan *Dan 3*

B—Purihin at ipagdangal ang Diyos magpakailanman!

R. M. Velez



* Pinupuri ka namin, Panginoon; Diyos ng aming mga ninuno; karapat-dapat kang ipagdangal at dakilain magpakailanman. Purihin ang iyong banal at maluwalhating pangalan, nararapat purihin at ipagdangal magpakailanman. **B.**

* Purihin ka sa iyong banal at marangal na tahanan; lubhang karapat-dapat kang awitan at dakilain magpakailanman. **B.**

* Purihin ka, na nakaluklok sa maringal mong trono, karapat-dapat kang awitan at dakilain magpakailanman. **B.**

* Mula sa iyong luklukan sa ibabaw ng mga kerubin, nakikita mo ang kalaliman, ang daigdig ng mga patay. Karapat-dapat kang purihin at dakilain magpakailanman. **B.**

* Purihin ka sa buong sangkalangitan; karapat-dapat kang awitan at dakilain magpakailanman. **B.**

Ikalawang Pagbasa *2 Cor 13: 11-13*

Sa pagwawakas ng kanyang Ikalawang Liham sa mga taga-Corinto, si San Pablo ay tumutukoy sa bawat Persona ng Banal na Santatlo. Kasama rin niyang binabanggit ang banal na katunayan ng pagpapala, pag-ibig, at pakikipag-isa ng Ama, Anak, at Espiritu Santo.

L—Pagpapahayag mula sa Ikalawang Sulat ni Apostol San Pablo sa mga taga-Corinto

Mga kapatid: Sikapin ninyong maging ganap at sundin ninyo ang mga payo ko; magkaisa kayo at mamuhay nang payapa. Sa gayon, sasainyo ang Diyos ng pag-ibig at kapayapaan.

Magbatian kayo bilang magkapatid kay Kristo. Kinukumusta kayo ng lahat ng mga kapatid sa simbahan.

Nawa’y sumainyong lahat ang pagpapala ng Panginoong Hesukristo, ang pag-ibig ng Diyos at ang pakikipag-isa ng Espiritu Santo.

Ang Salita ng Diyos!

B—Salamat sa Diyos!

Aleluya *Pah 1:8*

B—Aleluya! Aleluya!

Dakila ang Amang mahal, Anak, Espiritung Banal, noon, ngayon, kailanpaman.

Aleluya! Aleluya!

Mabuting Balita *1n 3:16-18*

Sa kanyang pakikipag-usap kay Nicodemo, ipinahayag ng Panginoong Hesus na ang Diyos ay isang misteryo ng pagmamahal ng tatlong Persona. Sa siping ito, binibigyan niya ng diin ang walang-takdang

pagmamahal ng Diyos sa sangkatauhan at ang pangangailangan ng lahat na muli silang maisilang sa Espiritu at magtamo ng buhay na walang hanggan sa pamamagitan ng pananampalataya sa Anak.

P—Ang Mabuting Balita ng Panginoon ayon kay San Juan

B—Papuri sa iyo, Panginoon!

Ani Hesus kay Nicodemo: “Gayon na lamang ang pag-ibig ng Diyos sa sanlibutan, kaya ibinigay niya ang kanyang bugtong na Anak, upang ang sumampalataya sa kanya ay hindi mapahamak, kundi magkaroon ng buhay na walang hanggan. Sapagkat sinugo ng Diyos ang kanyang Anak, hindi upang hatulang maparusahan ang sanlibutan, kundi upang iligtas ito sa pamamagitan niya.

Hindi hinahatulang maparusahan ang nananampalataya sa bugtong na Anak ng Diyos; ngunit hinatulan nang parusahan ang hindi nananampalataya sa kanya.”

Ang Mabuting Balita ng Panginoon!

B—Pinupuri ka namin, Panginoong Hesukristo!

Homiliya

Sumasampalataya

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkatawang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P – Taglay ang tinanggap nating buhay at pananampalataya buhat sa Banal na Santatlo, idulog natin sa trono ng kaluwalhatian ang mga pangangailangan ng sangkatauhan. Maging tugon natin ay:

B–O **Kabnal-banalang Santatlo, dinggin Mo kami!**

* Para sa buong Simbahang Katolika, na siyang mag-anak ng Diyos sa lupa: Nawa ipahayag niya sa kanyang mga turo at mga pagsisikap ang pagmamahal ng Banal na Santatlo para sa lahat ng tao. Manalangin tayo! **B.**

* Para sa Santo Papa, ating Obispo, at ating Kura Paroko: Nawa sila’y maging laging malakas sa pagtupad sa kanilang tungkulin at malasap nawa nila ang bunga ng kanilang katapatan. Manalangin tayo! **B.**

* Para sa lahat ng kaanib ng iba’t ibang sangay ng Kristiyanismo: Nawa sa kanilang parehong pananampalataya sa Banal na Santatlo, sila’y mamuhay na nagkakaisa at mapayapa. Manalangin tayo! **B.**

* Para sa lahat ng mga mag-anak sa ating pamayanan: Nawa mailarawan sa kanilang pakikitungo sa isa’t isa ang pagmamahalan ng tatlong Banal na Persona. Manalangin tayo! **B.**

* Para sa ating sarili at lahat ng mahal natin sa buhay: Nawa lagi nating isaisip na kapiling natin ang Banal na Santatlo at humango tayo rito ng galak, lakas ng loob, at inspirasyon. Manalangin tayo! **B.**

* Tahimik nating ipanalangin ang ating mga pansariling kahilingan. (*Tumigil sandali.*)

Manalangin tayo! **B.**

P – O Diyos na walang hanggan, nilikha Mo kaming kalarawan Mo at pinagkalooban kami ng bagong buhay sa sakramento ng Binyag. Puspusin Mo kami ng Iyong pananatili’t tanggapin kami sa Iyong Kaharian kung saan Ka nabubuhay at naghahari magpakailanman!

B–Amen!



P – Manalangin kayo . . .

B – Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P – Ama naming Lumikha, gawin mong banal ang mga alay na aming inihanda ngayong aming sinasamba at sinasambit ang ngalan mong dakila at pakundangan sa mga alay na ngayo’y nasa dambana kami nawa’y maging laging nakalaan sa iyong adhika sa pamamagitan ni Hesukristo kasama ng Espiritu Santo magpasawalang hanggan.

B – Amen!

Prepasyo

P – Ama naming makapangyarihan, tunay ngang marapat na ikaw ay aming pasalamatan.

Kaisa ng iyong Anak at ng Espiritu Santo ikaw ay iisang Diyos na pinapanginoon ng mga tao. Ang iyong Anak at Espiritu’y di naiiba sa pagka-Diyos mo anupa’t kahit tatlo’y iisang Diyos na totoo. Ang kadakilaan mong ipinahihiwatig upang aming panaligan ay siya rin naming sinasampalatayanan tungkol sa iyong Anak at Espiritung Banal. Bagama’t may tanging pag-iral ang bawat isa, iisang Diyos pa rin ang aming sinasamba, sa kapangyarihang taglay ay walang pagkakaiba.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan:

B – Santo, santo, santo Panginoong Diyos ng mga hukbo. Napuno ang langit at lupa ng kadakilaan mo. Osana sa kaitaasan!

Pinagpala ang naparirito sa ngalan ng Panginoon. Osana sa kaitaasan!

Pagbubunyi

B – Aming ipinahahayag na namatay ang ‘yong Anak, nabuhay bilang Mesiyas at magbabalik sa wakas para mahayag sa lahat.



B – Ama namin . . .

P – Hinihiling namin . . .

B – Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B – Kordero ng Diyos na nag-aalis ng mga kasalanan ng sanlibutan, maawa ka sa amin.

Kordero ng Diyos na nag-aalis ng mga kasalanan ng sanlibutan, maawa ka sa amin.

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P – Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B – Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(*Ipahahayag lamang kung walang awiting nakahanda.*)

Espiritu ng D’yos Anak ang bi-gay sa ating lahat ng D’yos Amang naghahangad na tayo ay makatawag ng “Ama” sa kanyang habag.

Panalangin Pagkapakinabang

P – Ama naming mapagmahal, mapakinabangan nawa ng aming buong katauhan ang pagtanggap namin sa mga banal na pinagsaluhan at ang aming pagsamba nang may pananampalatayang lubusan sa Tatlong Persona ng Iisang Diyos lamang sa pamamagitan ni Hesukristo kasama ng Espiritu Santo magpasawalang hanggan.

B – Amen!



P – Sumainyo ang Panginoon.

B – At sumaiyo rin!

P – Magsiyuko kayo at manalangin para sa pagpapala ng Diyos. (*Manahimik saglit.*)

Iligtas nawa kayo ng ating Diyos Ama sa panganib at pagkalooban kayo ng lahat ng kabutihan.

B – Amen!

P—Puspusin Niya nawa ang inyong mga isipa't puso ng Kanyang Salita at gabayan kayo sa walang-hanggang kagalakan.

B—Amen!

P—Patubayan nawa kayo ng Kanyang Espiritu sa pagkilala't

paggawa ng tama't marapat sa Kanyang landas.

B—Amen!

P—Pagpalain nawa kayo ng makapangyarihang Diyos: Ama, Anak, at Espiritu Santo!

B—Amen!

P—Humayo kayo sa kapayapaan upang mahalín at paglingkuran ang Panginoon!

B—Salamat sa Diyos!



ANG BUKAL NG LAHAT NG BUHAY AT KABUTIHAN

Higit na nakaginhawa sa atin ang sumampalataya sa isang Diyos na iisa ring persona. Ganito ang pananampalataya ng Judaismo at Islam. Ganito rin ang Diyos na “matutuklasan” sa pamamagitan ng pilosopiya.

Subalit ang Diyos na ipinahahayag ni Hesus ay isang katotohanang higit na mayaman. ***Ipinakilala niya ang Diyos bilang “Ama,” na may “Anak,” at ang “Espiritu Santo” bilang pagpapahayag ng kanilang pagmamahalan sa isa’t isa, at nag-uugnay sa kanila.*** Ang Diyos na ipinahayag ni Hesus ay totoong ***misteryo ng pag-ibig*** – isang pag-ibig na bukal ng lahat ng naririto, at kaganapan ng lahat ng nilikha.

Ang pag-ibig ng Ama, ng Anak, at ng Espiritu Santo ay lubos na ganap at laganap kaya ginagawa nitong maging iisang katunayan ***ang tatlong banal na “Persona” – ang Banal na Santatlo.*** Ang salitang ito ay wala sa Bibliya. Ito ay nilikha ng mga teologo upang maipahayag sa isang maikli subalit mabisang paraan ang misteryo ng isang Diyos na may tatlong Banal na Persona, ngunit nanatiling iisa at buo.

Ang Diyos lamang ang makapagpapahayag kung ano ang Kanyang tunay na katauhan, at gayon din ang Kanyang kaugnayan sa lahat

ng naririto, lalung-lalo na sa sangkatauhan. Isinakatuparan Niya ito sa buhay at aral ni Hesuskristo.

Mula kay Hesus ay natutuhan natin na tayong lahat ay may kaugnayan sa Banal na Santatlo at minamahal Niya nang lubos.

Tayo ay hindi lamang nilikha na kalarawan ng pagmamahalan ng Tatlong Personang ito, kundi iniligtas din at pinababanal Nito. Sa binyag, tayo ay nilikhang muli at higit na naitulad sa Banal na Huwaran yamang tayo ay naging mga inampong anak ng Ama, mga kapatid ng Anak, at mga tahanan ng Espiritu Santo.

Matatagpuan din natin ang ating kaganapan at lubos na kaligayahan sa Kanya lamang.

Ang ating buhay sa mundo ay hindi sapat upang maunawaan ang kahalagahan ng personal na relasyon na nag-uugnay sa atin sa bawat Banal na Persona. ***Sa kabilang buhay lamang natin makikita ang kahanga-hangang Diyos nang “harap-harapan,” na ang ibig sabihin ay makikilala natin Siya ayon sa tunay Niyang kalagayan sa atin.*** At ang “pagkakilalang” ito ang magiging pinakadiwa ng ating kapalarang walang katapusan, na siyang makapagpapaligaya sa atin magpasawalang hanggan.



Makinig sa Radyo Totoo (846 kHz) tuwing Sabado alas-5:00 hanggang alas-6:00 ng gabi, at makibahagi sa

“BISPERAS SA VERITAS”

– ang masigla’t “interactive” na palatuntunang pantulong para tuklasin ang mensahe ng Salita ng Diyos para sa ikatatatag ng inyong buhay, mag-anak, at pamayanan.



Word & Life Publications



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org, wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, G. Ramos, R. Molomog, V. David, K. Dy, D. Daguio

• Illustrations: A. Sarmiento, B. Cleofe • Circulation: R. Saldua